



Anna Monn-Monn
29.06.1917 - 13.03.2008

Nossa cara tatta Anna ei naschida ils 29 da zercladur 1917 a Surrein, sco emprema dad 11 affons ord la lètg da Gion Antoni e Barla Catrina Monn-Curschellas.

Ord motivs da sanadad dils geniturs ha nossa tatta gia baul stuiu segidar el tener casa, sco era ella educaziun dils fargliuns giuvens. Aschia che la tatta ha già sco giuvnetta empriu da viver sempel ed esser cunteenza cun pli pauc.

Pli tard ha ella giu la caschun da luvrar en fabrica a Sedrun, nua ch'ella scarsinava e luvrava si la launa. Bia pazzas ha la tatta buca giu, denton ha ella adina giu grond plascher sch'ella ha saviu gidar autras famiglias, seigi quei cun lavurs da cuser ni era el tener casa.

Igl onn 1947 ha la tatta maridau il giuven Benedetg Monn. Ord quella lètg ei sortiu 6 affons che han astgau crescher si en in pign menaschi puril. La tatta ei mai selamentada, era sch'ella ha buca adina giu sempel.

Ella ha adina teniu ault sia famiglia, la lavur e finalmein la cardientscha el Segner.

A mi ha la tatta adina detg, sch'ins ha la sanadad e la pasch, han ins tut!

Igl onn 1977 ei stau in grev onn per nossa cara tatta. Suenter liunga malsogna ha ella stuiu prender cumiau da siu um Benedetg. Quei ei stau ina gronda frida per ella. Mo denton cul sustegn da ses affons e sia ferma cardientscha, ha ella puspei anflau anavos sia legria e cumentientscha.

La tatta Anna ei adina stada cheu per tuts. Ses biadis ha ella adina teniu fetg ault e bugen puppergnau.

Igl onn 2003, cun 86 onns ha la tatta adina detg pli savens a mi, ella sent ch'ella vegni veglia e la forza laschi plaunsiu suenter. Ord quei motiv ha ella giavischau da prender dimora en «Tgèsa sogn Vigeli» Mo denton già suente cuort temps fuss ella il pli bugen puspei turnada anavos en siu ver dacasa.

Ella ha manegiau che la «Tgèsa sogn Vigeli» seigi plitost per glieud pli passada.

Ella sesenteva pia aunc cun ses 86 onns giuvna.

Mo cul temps ha era ella acceptau las fleivlezias dalla vegliadetgna. Denton ei en «Tgèsa sogn Vigeli» ha nossa cara tatta mai piars sia legria e cumentientscha.

Cun gronda carezia ei ella vegnida tgirada en «Tgèsa sogn Vigeli». E da tut sias biaras visetas ha ella adina giu grond plascher e cunzun grond quet. Il pli bugen deva nossa cara tatta cun las visetas «troccas» ni «pischaletg».

En scadin cass sai jeu buca seregurdar, che jeu havess mo ina ga saviu dumignar mia tatta en dar «troccas» ni «pischaletg». Quei era zatgei nunpusseivel.

Nossa cara tatta, ha mai stuiu star mo in soli sulet di en «Tgèsa sogn Vigeli» senza survegnir visetas.

Bugen admettel jeu in grond engraziament a mia cara onda Rita. Ella ha teniu fetg ault sia cara mumma e mirau fetg dad ella, e quei tochen sia davosa ura, cura che nossa cara tatta ha serrau cun in lev surrir per adina ses eglis.

Cara tatta, engrazia per tut quei che Ti has fatg per nus tuts.

Nus vegnin mai ad emblidar Tei...

Ruaussa en pasch...

Tiu biadi Damian